

## **Djuão kute memã pi'ôk kumrêx no'ôk ne ja.**

Jejukôt ba djwÿnhbê Djuão ne me kute Jeju marmã pi'ôk no'ôk ne. Arÿm kubêngê:tte ne arkum pi'ôk no'ôk ne kum ar abên kam kum,

—Ikra ar, akmere ar, àpnhîre ar, Metîndjwÿnh ne amijo ï ne me bawÿr ruw. Kubê ne Jeju. Arÿm gwaj baje Jeju markam Bãmdjwÿ ma. Metîndjwÿnh kumrêx ne kum gwaj bajabê gwaj kam amipãnh bamã abê ne kam bamã kradjwÿ jabê, baje abeno bakamykam bamã aben jabê ne kam Metîndjwÿnh kabên kôt ar amijo baba, bamã abêkam. NhyM Metîndjwÿnh arÿm Jeju kôt gwaj bajaxwe kunï maro akno. Kam dja gwaj kum amijarê nhyM arÿm gwaj bamar krâta. Nãm ã Djuão kute arkum 'ã karôo ane.

*Kabên kute mÿjja kunïmã tïn jangjênhja'ã ujarênh.  
Dju k 5.11; Ap 1.18*

<sup>1</sup> Be, amrêbê ne me'ô nhidjibê Kabên, kute mÿjja kunïmã tïn jangjênhja, mÿjja kunï kêtri Kabênja. Kabênja ar imã kabên jarê bar kabênkôt kuman inoo omũ. Ne arÿm prïne omũnh mex ne ar in-hikrao kupê. Tãm ne bar memã 'ã idjujarênh ar iba.

<sup>2</sup> Tãmja, kute mÿjja kunïmã tïn jangjênhja ne pykakam bôx ne amijo amirît bar arÿm omũn kam 'ã ar amã amijarê. Metîndjwÿnhkôt me tïn rã'ã: rã'ã kadjy ne me'ôja kute memã tïn jangjênh. Ja ne bar

ar amã arê. Ta ne me Babãm djwÿnhmẽ ro'ã ar ban kam arÿm pykakam ar imã amijo amirît.

<sup>3</sup> Bar ije omÿnh ne mar kôt ar amã arê. Gwaj ba baje abeno banhõbikwa kadjy ar amã arê. Gwaj baje abeno banhõbikwakam mrãmri ne baje me Babãm djwÿnhmẽ Kra Jeju Kritu aro banhõbikwa.

<sup>4</sup> Mÿj kadjy ne ba ja'ã ar amã pi'òk no'òk ne? Bir, dja gar omÿn aman arÿm mrãmri akĩho akĩhkumrêx. Ja kadjy ne ba 'ã ar amã pi'òk no'òk ne.

*Me kute katàt amijo ba.*

*Dju r 8.12; Ep 5.8; Tex k 5.5*

<sup>5</sup> Ga, akamàt kô tykkam me kute mÿjja pumÿnh kêt ne mrãnh punuja pumÿ. Nhym me memã pry kurwÿ nhym me arÿm irãkam katàt ba. Me axwedjwÿ ne me mrãnh punu nhym me arÿm memã Metĩndjwÿnh kabên jarê. Nhym kam me arÿm amim kuman kabênkôt katàt amijo ba kute mrãmri ne me irãkam katàt baja pyræk. Metĩndjwÿnhdjwÿ djãm mrãnh punun axwe? Arkati. Katàt amijo ban axwe kêtumrêx. Tãm ne Metĩndjwÿnh ar imã arê bar arÿm kuman arÿm ar amã arê.

<sup>6</sup> Gwaj badjwÿ godja gwaj memã kum, “Metĩndjwÿnh ne ijo õbikwan ijo ba”, ane. Ne atekam akamàt kô tykkam bamrãnh punumãn pràbê amim Metĩndjwÿnh kabên mar kêt ne bamrãnh punun bajaxwe. Djãm kam mrãmri bakabênkumrêx? Kati. Nã gwãm amijo bajêx ne katàt bakabên kêtumrêx. Metĩndjwÿnh kute gwaj bajo õbikwa kêt ne kute gwaj bajo ba kêt.

<sup>7</sup> Metĩndjwÿnh ne katàt ar amijo ban axwe kêtumrêx. Nãm kute mrãmri ne me irãkam katàt

ba pyræk. Dja gwaj kudjwa kabên kôt katàt amijo baban bamã bajaxwe prãm kêt ne kam arým mrãmri bajêx kêt. Nhyim kam Metĩndjwýnh mrãmri gwaj bajo õbikwakumrêx ne kute gwaj bajo bakumrêx. Ne kam arým prĩne gwaj bajo mex. Kra Jeju Kritu kamrôkôt gwaj bajo mex.\* Kute mrãmri ne me kute mýjja punu põnh nhyim arým prĩne mex pyræk. Dja ã gwaj bajo mexo ane.

*Me kute amijaxwe kôt Metĩndjwýnhmã amijarênh.*

<sup>8</sup> Godja gwaj baje amim,

—Djãm ijaxwe? Kati. Ijaxwe kêtikumrêx, anhýr jabej, ne kam arík amim bajêx ne bakabên katàt kêtikumrêx.

<sup>9</sup> Nâr godja gwaj tu bajaxwe kôt kum amijarê nhyim Metĩndjwýnh arým gwaj bajaxwe maro aknon gwaj bakam ngryk kêt ne prĩne gwaj bajo mex. Mrãmri ne kabên kajgo kêt ne katàt kute amijo bakumrêx. Kam dja prĩne gwaj bajo mex gwaj arým kum bajaxwe kêt.

<sup>10</sup> Djãm gwaj ba ne gwaj bajaxwe kêt? Kati. Metĩndjwýnh ne arým memã kum, “Me kunĩ kupãnhã axwe”, ane. Kam, godja gwaj baje memã kum, “Kati, ijaxwe'õ kêt”, anhýr jabej ne arým Metĩndjwýnh kute me'õ 'êxnhĩ pyræk. Ne arým baje amim, “Metĩndjwýnh 'êxnhĩ”, anhýr pyræk. Ne kam baje Metĩndjwýnh kabên mar kêtikumrêx.

## 2

*Me nêje Metĩndjwýnhmã kabên djwýnh'ã ujarênh.  
Xim k 2.5; Idja 4.14, 9.11*

---

\* **1:7** Dja jãm gwaj bajaxwe man jãm bajaxwe pãnh kamrô prõtja man kam prĩne gwaj bajo mex.

<sup>1</sup> Akmere, àpnhĩre ar, mỳkam ne ba ar amã ikabẽn ja'ã pi'òk no'òk ne? Bir, ar ajaxwe kêt kadjy. Godja gwaj bajõ arỳm bajaxwe jabej. Mỳj dja gwaj amim arẽn kuma? Bir, dja gwaj amim,

—Kàjkwakam ne me'õ dja. Jeju Kritu ne dja. Axwe kêt kumrêx. Ta dja inêje Metĩndjwỳnhmã kabẽno dja. Ta dja inêje kum kabẽn nhym arỳm ijaxwe maro aknon ikam ngryk kêt, ane. Dja gwaj ã bajõ bajaxwe jabej amim ane.

<sup>2</sup> Jejubê ne gwaj bakam ngryko apêx djwỳnh. Metĩndjwỳnh ne gwaj bajaxwekam ngryk nhym Jeju kute gwaj bajaxweo pãnh kadjy arỳm ty. Ne kam tyk jakam arỳm gwaj bajaxweo pãnh nhym kam arỳm gwaj bakam ngryk kêt. Djãm gwaj bajbit? Kati. Me kunĩ. Apỳnh pykakam me ba djari me kunĩ jaxwe nhym Jejubê mekam ngryko apêx djwỳnh.

<sup>3</sup> Djãm mrãmri ne gwaj baje amim Jeju markumrêx? Mỳj dja gwaj ja mar on? Bir, dja gwaj me kute katàt amijo ba'ã kute memã karõkõt kabẽnja markumrêx ne kõt ar amijo baba. Ne kam arỳm amim,

—Be ga, ije kabẽn markumrêx ne kõt amijo ibaja pumũ. Mrãmri ije amim Jeju markumrêx, ane. Gwaj kam arỳm ja ma. Gwaj baje amim Jeju markumrêxja ma.

<sup>4</sup> Jeju ne me kute katàt amijo ba'ã memã karõn memã arẽ. Godja gwaj kabẽn mar kêt ne kõt amijo baba kêt jabej ne memã kum, “Ba ije amim Jeju mar”, anhỹr jabej. Ne kam bajêx ne bakabẽn katàt kêt.

<sup>5</sup> Nàr, godja gwaj kabẽn man kõt amijo baba jabej arỳm mrãmri bamã Metĩndjwỳnh jabêkumrêx.

Ne bamã abêo amũ amikamênho mõn kam arým amim,

—Mrãmri ne Metĩndjwýnh kute amikõt ijo bakumrêx. Ga, imã abêkumrêxja pumũ, ane. Gwaj kam arým ja markumrêx. Metĩndjwýnh kute amikõt gwaj bajo baja markumrêx.

<sup>6</sup> Me kute,

—Ba ne ba ije Jeju 'amýnh týx ne 'ã idjukanga kêt, anhýrja ren katàt amijo ba kute ta katàt amijo ba pyræk.

*Me kum kamy jabêmã.*

*Dju r 13.34, 15.12; Dju k 3.14*

<sup>7</sup> Akmere, àpnhĩre ar, imã ar ajabê. Ije ar amã katàt aje amijo aba'ã karõkam djã ne ba me kabên ny'õ jarê? Kati. Me kabên tũm ne ba arê. Ar aje Jeju kõt amijo abikamênh krax djâkam me kute ar amã kabên jarênh ja ne ba ar amã arê.

<sup>8</sup> Ne kam ajte pi'òk jakam katàt aje amijo aba'ã ar amã karõ. Kute mrãmri ne ikabên ny pyræk ne ba ar amã arê. Jeju kumrêx kute kabên ja mar týx ne kõt ar amijo ba. Gar arým kudjwa kõt ar amijo aba. Nhym kam kabên ar amã kute mrãmri ne ny pyræk. Gar kõt ar amijo aba nhym kam me arým Jeju mex man ar gadjwý ar amex ma. Ne kam ar ajã amim, “Mrãmri ne ar kabênkumrêx”, ane. Mýkam? Bir, gar arým me kukràdjã punu kanga. Me kukràdjã punu kute akamàt kô tyk pyræk arým kanga. Ne kam arým Metĩndjwýnh kukràdjã ny ma. Kukràdjã ny kõt gar katàt ar amijo aba kute mrãmri ne irâkam me katàt baja pyræk. Nhym kam me arým ar ama.

<sup>9</sup> Dja me'õ memã kum,

—Ba ne ba Metĩndjwỳnh kaběnkôt katàt ar amijo iba kute mrãmri ne me irākam katàt baja pyrāk, ane. Ne atekam kum kamy kurê. Gwaj baje Jeju kaběnkôt o bakamyja kurê. Djām mrãmri ne katàt kute amijo bakumrêx? Kati. Axwen kute amijo ba punu rã'ã kute mrãmri ne me akamàt kô tykkam ba punu pyrāk.

<sup>10</sup> Nhy m be, me'õ kum kamy jabêja ne mrãmri Metĩndjwỳnh kaběnkôt katàt kute amijo bakumrêx. Katàt kute amijo ba kute mrãmri ne me irākam katàt ba nhy m mỳjja'õ kute me par tok kêt pyrāk.

<sup>11</sup> Nhy m be, me kum kamy kurêja ne arỳm amim 'êx ne aminoo aknon kute katàt kute amijo baja mar kêt kumrêx. Kute mrãmri ne me'õ akamàt kô tykkam no biknor ne kute amipry mar kêt pyrāk. Mỳkam ne kute katàt kute amijo baja mar kêt? Bir ga, me akamàt kô tykkam baja te rĩtmãja pumũ. Nhy m nokam akamàt kô tykbit. Me kum kamy kurêdjwỳ ne me amakkre kêt ne kam kute katàt kute amijo baja mar kêt.

<sup>12</sup> Ar aprĩre, akmere, àpnhĩre ar, mỳkam ne ba ã ar amã ikaběnh jarěho ane? Bir, gar ajaxwe nhy m Jeju arỳm ar ajaxwe pãnh ty. Nhy m kam Metĩndjwỳnh arỳm Jeju man arỳm ar ajaxwe maro aknon ar akam ngryk kêt ne. Kam ne ba pi'òkkam ã ar amã arěho ane.

<sup>13</sup> Ar akra krãptĩ, ar amã ne ba pi'òk no'òkkam ikaběnh jarě. Mỳkam? Bir, Křitu ne mỳjja kunĩ kětři ar ba. Ar aje Křitu markam ne ba ar amã ikaběnh jarě.

Ar ajabatành nymã ne ba pi'òk no'òkkam ikaběnh jarě. Mỳkam? Bir, Xatanaj ar ajaxwemã te

kute amiwÿr ar ajo akêxmã gar arÿm mar kêt ne arÿm o apa. Kam ne ba ar amã arê.

Ar aprîre, ar amã ne ba pi'ôk no'ôkkam ikabên jarê. Mÿkam? Bir, ar aje me Babãm djwÿnh markam ne ba ar amã arê.

<sup>14</sup> Ar akra krãptĩ, ba ne ba pi'ôk no'ôkkam ar amã ikabên jarê. Mÿkam? Bir, Kritu mÿjja kunĩ kêtri ar baja ar aje markam ne ba ar amã arê.

Ar ajabatàn ny, ba ne ba pi'ôk no'ôkkam ar amã ikabên jarê. Mÿkam? Bir, Xatanaj ar ajaxwemã te kute amiwÿr ar ajo akêxmã gar arÿm kubê atÿx ne Metĩndjwÿnh kabên mar tÿx ne 'amÿnh tÿx. Ne kam 'ã adjukanga kêt ne arÿm Xatanajo apa. Kam ne ba ar amã ikabên jarê.

*Me kum Metĩndjwÿnh kĩnh kêtja kukràdjà punu'ã ujarênh.*

<sup>15</sup> Me kum Metĩndjwÿnh kĩnh kêtja kukràdjà punu, me ò mÿjja punudjwÿ, kwãrĩk wãnh ar amã kĩnh kêt. Me kum me kukràdjà punu kĩnhja kum Metĩndjwÿnh jabê kêt kumrêx.

<sup>16</sup> Mÿkam ne me kum abê kêt? Bir, djãm me Babãm djwÿnh kute memã kukràdjà punu jarênh? Kati. Me kum Metĩndjwÿnh kĩnh kêtja ne me kute memã kukràdjà punu jarênh. Me axwe kadjy ne me kute memã arênh ne memã kum,

—Dja ga amidjwÿnhbito kĩnh, anhÿro ba. Me axwe kadjy ne me ajte memã kum,

—Dja ga amim mÿjja pumũnh tÿx, anhÿro ba. Me axwe kadjy ne me ajte memã kum,

—Dja ga amibên amijo adjàmra, anhÿro ba. Me kukràdjà punu ja ne me kum Metĩndjwÿnh kĩnh kêtja memã arênhô ba.

<sup>17</sup> Dja me kum Metĩndjwÿnh kĩnh kêt kukràdjà punuja ï apêx ne me kum mÿjja punu kĩnhdjwÿ ï apêx. Nhym be, me kute Metĩndjwÿnh kabên mar ne kôt kute amijo ba rà'ãja ne me Metĩndjwÿnh kôt tĩn ne ar ba rà'ã: rà'ã ne. Kam kwârĩk wãnh ar amã me kukràdjà punu kĩnh kêt.

*Kritu kurê djwÿnh'ã ujarênh.*

<sup>18</sup> Be, arÿm ijabatành mexkam ba ar amã ikabên jarê. Dja gar amim ikabênja ma. Arÿm akati bôx 'ÿr. Arÿm mÿjja kunĩ kute pykakôt amingrành nhym me kunĩ kute aminhinomã amimênh 'ÿr. Dja akati bôx nhym Kritu kurê djwÿnh rax arÿm amirĩt gwaj arÿm omũ. Kritu kurê djwÿnh rax ja ne me arÿm ar amã 'ã ajarê. Nhym kute amirĩt kukãm arÿm ajbir jakam kurê djwÿnh kumex ne amirĩt ne. Kumex amirĩt nhym me arÿm gwaj bamã me arê gwaj kam kôt amim,

—Mrãmri arÿm gwaj bawÿr õ akati bôx 'ÿr. Ga, kukãm kurê djwÿnh kumex arÿm amirĩtja pumũ, ane. Gwaj kam arÿm ja markumrêx. Ne amiwÿr akatija markumrêx. Ne amiwÿr me kunĩ kute aminhinomã amimênh nhõ akatija markumrêx.

<sup>19</sup> Amrêbê ne Kritu kurê djwÿnhja gwaj baje amim Jeju marjamê ro'ã krĩ. Nhym be, arÿm ne me Kritu bê amijo akêx ne ate ar ban gwaj baro'ã krĩ kanga. Gwaj kam arÿm memã bakaton abenmã kum,

—Be, Kritu kurê djwÿnh ne wã, ane. Gwaj baro'ã me krĩkam djãm mrãmri me kute gwaj bakôt amim



Jeju markumrêx? Kati. Me ren markumrêx ne ren Jeju bê amijo akêx kêt ne ren kator kêt. Nhym be, kati. Me kute Jeju mar kêt'ã kute amijo amirît kadjy ne me arým kato.

<sup>20</sup> Be, Kritu kurê djwýnh dja ar amã 'êx ba. Dja me te ar amã 'êx gar me mar prãm kêtkumrêx. Mýkam ne ar aje me mar kêt? Bir, Kritu mextire ne axwe kêtkumrêx ne arým ar amã Karõ jano nhym arým ar ajo ba. Kute ar ajo bakam ar aje me kabên katàt kunĩ mar ne aje Kritu kurê djwýnhja mar prãm kêt.

<sup>21</sup> Djãm ar aje me kabên katàt mar kêtkam ne ba ar amã pi'ók ja no'ók ne? Kati. Ar aje me kabên katàt markam ne ba ar amã no'ók ne. Be, me kute memã 'êx bakam ne me kute me kabên katàtkôt arênh kêtkumrêx. Ja ne gar arým aje mar.

<sup>22</sup> Nhym mýj me'õ ne 'êxnhĩkumrêx? Bir, me 'êxnhĩ ne me memã kum,

—Djãm Jeju'ã ne Metĩndjwýnh kute me banhõ Bēnjadjwýrbê kumkati mēnh got? Djãm Jejubê Kritu got? Kati. Atemã. Nãm me ã memã anhýro ba. Me ja ne me 'êxnhĩkumrêx. Me kute Bãm japrýn Kra japrý. Me ja ne me kubê Kritu kurê djwýnhkumrêx.

<sup>23</sup> Me kute Kra mar kêtja ne me kute Bãm mar kêtkumrêx. Me kute tu amim Kra markumrêxja ne me kute tu amim Bãmdjwý markumrêx.

<sup>24</sup> Me kute amrêbê ar amã kukràdjà jarēnh dja gar 'amýnh týx ne tu amim markumrêx ne 'ã adjukanga kêt. Ar aje Jejukôt amijo abikamēnh krax djàkam me kute ar amã kukràdjà jarēnhja dja gar 'ã adjukanga kêt. Godja gar 'ã adjukanga kêt jabej ne kam Kramē Bãmdjwý 'ã adjukanga kêt.

25 Nhyam kam Bãm gwaj bamã,

—Dja gar ikôt atĩn ne ar aba rã'ã: rã'ã ne, ane. Mrãmri ne gwaj bamã ja jarēnhkumrêx. Kabēn pydjĩn arē.

26 Be, Kritu kurê djwýnh kute Metĩndjwýnhbê gwaj bajo akêx prãm. Mekôt bajaxwemã kubê gwaj bajo akêx prãm. Me'ã ne ba ije ar amã pi'ók no'ókja.

27 Dja me te: kute ar ajo akêxmã ar ajo ane. Mýkam? Bir, Metĩndjwýnh kute ar amã Karõ janor nhyam kute ar ajamýnh týx ne ar ajo bakam. Karõ kute ar ajo bakam djãm atemã me'õ kute ar amã, “Ota, me'õ 'êxnhĩ ”, anhýrmã? Kati. Karõja ta dja ar amã me 'êxnhĩ jarē. Ta ne kute ar amã mýjja kunĩ, me kukràdjã kunĩ jarēnh ne katàt kute ar amã arēnhkumrêx. 'Êxnhĩ kêtikumrêx. Amrēbê kute ar amã kukràdjã jarēnh kôt dja gar mã Kritu 'amýnh týxkumrêx ne tu amim markumrêx ne 'ã adjukanga kêt. Nhyam kam me te: ar amã 'êx ne kute ar ajo akêxmã.

*Metĩndjwýnh kra ar'ã ujarēnh.*

28 Be, arým ijabatànħ mexkam ne ba ar amã ikabēn jarē. Dja gar amim ikabēnja ma. Dja gar amim Kritu 'amýnh týx ne 'ã adjukanga kêt. Gwaj amim 'amýnh týx ne 'ã badjukanga kêt nhyam arým gwaj bamã amijo amirĩt. Gwaj bamã amijo amirĩt gwaj kam arým bamã uma kêt ne bapijãm kêt ne dja.

29 Gar arým aje Jeju katàt kute amijo baja mar. Me katàt kute amijo baja kunĩdjwý Metĩndjwýnh arým meo kra nhyam me umar djã ny. Jadjwý gar arým aje mar.

### 3

<sup>1</sup> Me Babãm djwỳnh ta ne arỳm gwaj bamã, “Ikra ar”, ane. Djãm kam kum gwaj bajabê ngri? Kum gwaj bajabê:kumrêx. Nhy m be, gwaj babê Metĩndjwỳnh krakam me kute gwaj bamar kêt. Me kum Metĩndjwỳnh kĩnh kêtja kute gwaj bamar kêt. Mỳkam? Bir, me kute Jeju mar kêt kam ne me kute gwaj bamar kêt.

<sup>2</sup> Akmere, àpnhĩre ar, jakam gwaj babê Metĩndjwỳnh krakumrêx. Ne kam mỳj dja gwaj ì bakute? Kon. Kraxje kute gwaj bamã o amirĩt kêt rã'ã gwaj baje mar kêt rã'ã. Nhy m be, Jeju dja ì gwaj bamã amijo amirĩt gwaj arỳm prĩne mexkõt omũ. Nhy m kam ta amikõt gwaj badjwỳ gwaj bajo mex gwaj arỳm baje Jeju pyræk. Ja ne gwaj baje markumrêx ne amim,

—Nà. Dja ijo mex ba arỳm ije Jeju pyræk, ane.

<sup>3</sup> Gwaj bawỳr Jeju bõxkam amakbê bamã bamex prã:m. Gwaj bamã bamex kute ta mex pyræk prã:m. Ne kam kam amak djêje amijo mexo tẽ.

<sup>4</sup> Nhy m be, me axwe ne me Metĩndjwỳnh kukràdjà mar kêt ne kam amikrà ar o ba. Metĩndjwỳnh te memã kum, “Kwãrĩk wãnh ajaxwe kêt”, ane nhy m me arỳm kam amikrà ar o ban tu axwe.

<sup>5</sup> Mỳj kadjy ne Kritu ruw ne nã kurũm katon ar ba? Bir, kute gwaj bamã bajaxweo apêx kadjy ne katon ar ba. Ja ne gar arỳm aje markumrêx ne amim,

—Kute imã ijaxweo apêx kadjy ne Jeju katon ar ba, ane. Djãm ta axwe'õ? Arkati.

<sup>6</sup> Me kute amim Jeju mar tỳxo ban 'ã ukanga kêtja ne me mã kum axwe prãm kêt. Nhy m be, me mã

kum axwe prãm kute amim Jeju mar kêt.

<sup>7</sup> Akmere, àpnhĩre ar, me kute me axwe'ã 'êx ne ar amã, “Me axwe kêt”, anhỹrkam kwãrĩk wãnh gê me'õ o ar anoo biknor kêt. Djãm me axwe mex? Kati. Me katàt kute amijo babit ne me mex. Jeju kôt me mex.

<sup>8</sup> Nnym be, me kute arek axweo ba prãmja ne Xatanaj meo ba. Mỳkam? Bir, Xatanaj adjakamã axwe krax ne kute arek axweo ba prãm. Kam ne arỳm me kute arek axweo ba prãmja Xatanaj kute meo ba. Metĩndjwỳnh Kra kute Xatanajo àpanh kadjy ne kato. Dja o apa nnym arỳm meo ba kêt nnym me arỳm axwe kêt. Ja kadjy ne nã kurũm katon ar ba.

<sup>9</sup> Metĩndjwỳnh kute meo krakam ne me arỳm umar djã ny. Kam ne me arek kute axweo ba prãm kêt. Metĩndjwỳnh Karõ\* kute mỳjja 'y pyrãk ne memã wadjàn me kadjwỳnhbê nhỹ, me axwebê àptàro nhỹ. Kam ne me te kute arek axweo bamã. Metĩndjwỳnh kute meo krakam ne me te arek axweo bamã.

<sup>10</sup> Mỳj xêbê ne Metĩndjwỳnh kra ar? Bir, Metĩndjwỳnh kra ne me kum axwe prãm kêt ne kum kamy jabê. Kum gwaj baje Jeju kabênkôt o bakamyja jabê. Kum kamy jabê gwaj arỳm kôt memã bakaton me omũ. Me jabê ne Metĩndjwỳnh kra ar. Ja ne gwaj omũ. Mỳj xêjabê ne Xatanaj kra ar? Bir, Xatanaj kra ne me kum axwe prãm ne kum gwaj bakamy jabê kêt gwaj kam arỳm kôt memã bakaton me omũ. Me jabê ne Xatanaj kra ar.

---

\* **3:9** Metĩndjwỳnh Karõ ne kabêno memã amak bô nnym me umar djã nyn arỳm kum axwe prãm kêt. Dja ga 'ã Ped k 1.23, Xij 1.18, Mat 13.3-23, Dju r 1.13, 3.5 jarên ama.

*Me kum aben jabê'ã kute memã karõ.*

<sup>11</sup> Ba ar amã arê gar ama. Metĩndjwýnh ne memã kum,

—Dja ga me amã aben jabê, ane. Ja ne gar aje amim Jeju marmo kraxkam aje mar ne mar rã'ã.

<sup>12</sup> Be, me bakukãmãre Kaĩ ne arým kamy bĩ. Kwãrĩk wãnh gar Kaĩ kôt ã amijo anhÿr kêt. Xatanaj ne Kaĩo ba nhym arým kamy bĩ. Mýkam ne kamy bĩ? Bir, ta àpênh jaxwe prãmkom nhym kamy katàt kute amijo ba prãmkom.

<sup>13</sup> Bir, akmere, àpnhĩre ar, godja me kum Metĩndjwýnh kĩnh kêtja kum ar akurê jabej. Kwãrĩk wãnh ar amim,

—Je tô mýkam ne me ã ijo ane? anhÿr kêt.

<sup>14</sup> Amrêbê gwaj bajaxwekam ne gwaj me biknor tokry djàkam bamõrmã. Djãm jakam kam gwaj bamõrmã? Kati. Jakam ne gwaj arým Metĩndjwýnhkôt batĩn ne ar baba rã'ã: rã'ã ne. Mýjkôt dja gwaj ja markumrêx, ne amim,

—Mrãmri ne arým Metĩndjwýnhkôt itĩn ne ar iba rã'ã: rã'ã ne, ane. Bir, gwaj arým mrãmri bamã bakamy jabêkumrêxkôt. Dja gwaj bamã bakamy jabêkumrêx ne arým amim,

—Mrãmri dja ba arým Metĩndjwýnhkôt itĩn ne ar iba rã'ã: rã'ã ne. Ga, arým imã ikamy jabêkumrêxja pumũ, ane. Gwaj kam arým ja markumrêx. Ne kam kôt batĩn ne ar baba rã'ã: rã'ãja markumrêx. Nhym be, me kum kamy jabê kêtja ne me me biknor tokry djàkam mõrmã rã'ã.

<sup>15</sup> Me kum kamy kurê kunĩ ne me kute me par djwýnh pyræk. Ne kam me par djwýnh dja Metĩndjwýnhkôt tĩn ne ar ba kêt. Ja ne gar arým aje mar.

16 Nhyrn be, Jeju mrãmri kum gwaj bajabêkumrêxkam arým gwaj bapãnh ty. Gwaj ren bamã aben jabê kute Jeju kum gwaj bajabê ne gwaj bapãnh tyk pyrãk. Nhyrn me ren arým kute gwaj bakamy'õnh bĩnmã. Gwaj ren bamã bakamy jabêkumrêxkam ren arým memã kum,

—Ba dja ga me ibĩ gẽ ikamy tĩn ne, ane. Gwaj ren bamã abêkumrêxkam gwaj ren ã memã ane.

17 Nhyrn be, me'õ nhõ mýjja nhyrn kamy nhõ mýjja kêt. Nhyrn arým omũ. Omũnho nhỹ:n kam arým amim,

—Je, djãm ije amikutã kum inhõ mýjja kwý nhõrmã? Kati. Dja ba kum õr kêt, ane. Djãm tãmwã ne Metĩndjwýnh kõt kum kamy jabê got? Kati.

18 Be, arým ijabatãnh mexkam ne ba ar amã ikabẽn jarẽ. Dja gar amim ikabẽn ma. Kwãrik wãnh gwaj bajajkwa kajgokambit memã, “Imã me abêkumrêx”, anhỹr kêt. Gwaj bakabẽn kwý kajgokumrêx. Ate dja gwaj bamã aben jabêkumrêx ne abenmã mýjja ngãn abenmã apê.

19 Dja gwaj bamã me abêkumrêx ne kam arým markumrêx. Metĩndjwýnh arým kute gwaj bajo aminhõkumrêx markumrêx. Ne kam arým amim,

—Mrãmri ne Metĩndjwýnh arým ijo aminhõkumrêx, ane. Ne kam ja markumrêx ne ate bakrãn badjumar mex ne ar baba.

20 Nhyrn be, godja gwaj banhõkre kadjwýnhbê amiman amim,

—Djãm mrãmri Metĩndjwýnh kabẽn kõt imã me abêkumrêx? Kati. Imã me abê rerekre, ane. Gwaj amiman arým badjumar punu. Ne kam ajte amim,

—Metĩndjwýnh ne kute mýjja kunĩ mar ne kute inhõkre kadjwýnhbê ikabẽn mar mexkumrêx. Ta

dja imã tỳx jadjà, ba arỳm imã me abêkumrêx, ane. Dja gwaj ã Metĩndjwỳnh'ã amim anen arỳm amikam badjumar punu kêt ne.

<sup>21</sup> Nàr atekam baje banhõkre kadjwỳnhbê amim bakabên markam amim,

—Kati. Metĩndjwỳnh kabênkôt imã me abêkumrêx, anhỳr jabej ne arỳm bamã Metĩndjwỳnh pyma kêt.

<sup>22</sup> Ne kam tu kute gwaj bamã mỳjja nhipêxo kum a'uw nhym arỳm gwaj bamã ipêx. Mỳkam? Bir, gwaj baje kabên mar ne kôt amijo baba nhym gwaj bakam kĩnhkam dja arỳm gwaj bamã ipêx.

<sup>23</sup> Metĩndjwỳnh ne gwaj bamã,

—Dja gar tu amim Ikra Jeju Kritu markumrêx ne ar amã aben jabê, ane. Gwaj kabên ja man kôt ar amijo baba. Tãm ne ja.

<sup>24</sup> Dja gwaj Metĩndjwỳnh kute abenã gwaj bamã karõja man kam kabên kôt ar amijo baba. Ne kam arỳm Metĩndjwỳnh kôt ar baba. Nhym kam arỳm gwaj bakadjwỳnhbê amijo kajkep. Djãm mrãmri ne Metĩndjwỳnh gwaj bakadjwỳnhbê mã amijo kajkepkmrêx? Mỳjkôt ne gwaj ja ma? Bir, Metĩndjwỳnh ne gwaj bamã Karõ jano. Karõ ta dja gwaj bamã,

—Arỳm ne Metĩndjwỳnh akadjwỳnhbê amẽ amijo kajkep, ane. Kam dja gwaj ja markumrêx, Metĩndjwỳnh gwaj bakadjwỳnhbê amijo kajkepja markumrêx.

## 4

*Me kute me mex jabej me kabimã.  
A Dju 7*

<sup>1</sup> Akmere, àpnhĩre ar, imã ar ajabêkam ne ba ar amã ikabên. Dja gar amim ikabênja ma. Dja me ar awỳr bôx jabej ne ar amã,

—Metĩndjwỳnh kukwakam ne ba ar amã 'ã ajarẽ, anhỳr jabej. Kumrêx dja gar amim me kabin me mrãmri Metĩndjwỳnh kabên kôt kabên katàtmã akato. Mỳkam? Bir, me ta kute amijo Metĩndjwỳnh kukwakam ujarẽnh djwỳnh ne amijo 'êx baja ne krãptĩ. Ne kam arỳm pyka kunĩkôt apôx ne ar ba. Kam dja gar amim me kabi.

<sup>2</sup> Mỳj dja gwaj amim me kabin memã bajapôx on? Bir, dja gwaj me kabên ma nhym me memã kum,

—Be, mrãmri ne Jeju Kritu kàjkwa kurũm ruw ne nã kurũm katon ar ba, ane. Godja me ã memã anhỳro ba jabej. Me wã dja gwaj me markumrêx. Nãm me amijo 'êx kêt ne mrãmri Metĩndjwỳnh kabên kôt kabênkumrêx.

<sup>3</sup> Nhym be, me kute memã anhỳr kêt ne ate memã kum,

—Be, kati. Nhỳnh ne Jeju Kritu kàjkwa kurũm ruw ne nã kurũm katon ar ba? Kati, anhỳro ba. Me kute memã ja jarẽnho ba ne me amijo 'êx ne Metĩndjwỳnh kabên kôt kabên kêt. Kritu kurê djwỳnh'õ ne ja. Ja ne me arỳm ar amã arẽ. Kritu kurê djwỳnh rax bôxmã arẽ. Bôx kukãm ne kurê djwỳnh kwỳ arỳm jakam katon mekôt ar ba.

<sup>4</sup> Akmere, àpnhĩre ar, Metĩndjwỳnh kôt gar arỳm akabên aba. Gar arỳm kam kurê djwỳnho apa. Mỳjkôt ne gar o apa? Bir, Jeju ar akam ỳrkôt. Jeju ne ar ajo ban tỳxo kute pykakam kurê djwỳnh kunĩ



jakrenh mexi.\* Gar kam kukwakam arým meo apa.

<sup>5</sup> Me kum Metĩndjwýnh kĩnh kêtja kôt ne Kritu kurê djwýnh amijo ba. Ne kam me kabên kôt kabên. Nhyim kam me kum Metĩndjwýnh kĩnh kêtja arým kum Kritu kurê djwýnh kĩnh ne me kabên maro ba.

<sup>6</sup> Nhyim be, ar ba ne bar ije memã Metĩndjwýnh kabên jarênhkam mrãmri memã kabên jarênhkumrêx. Me kute ar ikabên markumrêxja gwaj arým me'ã abenmã,

—Mrãmri kute Metĩndjwýnh markumrêx. Ga, kute Metĩndjwýnh kabên markumrêxja pumũ. Mrãmri kabênkumrêx, ane. Nhyim be, me kute ar ikabên mar kêtja gwaj arým me'ã abenmã kum,

—Kati. Kute Metĩndjwýnh mar kêt. Ga, kute Metĩndjwýnh kabên mar kêtja pumũ. 'Êxnhĩkumrêx, ane. Gwaj ã amim me kabio anen arým memã bajapôx ne arým me kuma. Me kabênkumrêx jabej nâr me 'êxnhĩ jabej arým memã bajapôx ne me kuma.

*Me kum aben jabêmã.*

*Mat 22.39; Dju r 13.34; Gar 5.14; Ped k 1.22*

<sup>7</sup> Akmere, àpnhĩre ar, imã ar ajabêkam ne ba ar amã ikabên. Me kute amim Metĩndjwýnh markôt ne me kum aben jabê. Kam gwaj bamã aben jabê. Mýj xêbê ne Metĩndjwýnh kra ar? Bir me kum me abêbit ne mebê Metĩndjwýnh kra. Metĩndjwýnh kra

---

\* **4:4** Djãm pykakambit kurê djwýnh nhyim týxo kute akrenh Kati, kâjkwakamdjwý. Jeju ne týxo kute kurê djwýnh kunĩ jakrenh mexi. Epedju 1.21-22 dja gar arên kôt ama.

ne me umar djà ny. Me kum me abêbit ne me kute Metĩndjwỳnh mar.

<sup>8</sup> Ta kum me abê nhym kam me arỳm kôt kum aben jabê. Kam, me kum me abê kêt kute Metĩndjwỳnh mar kêt.

<sup>9</sup> Metĩndjwỳnh kum gwaj bajabê. Mỳjkôt ne gwaj baje ja mar. Bir, nãm arỳm gwaj bawỳr Kra djwỳnh jano. Kra pydji jano nhym pykakam bôx. Gwaj kôt batĩn ne ar baba rã'ã: rã'ã kadjy. Kam ne gwaj baje Metĩndjwỳnh kum gwaj bajabêja markumrêx ne amim,

—Nà. Metĩndjwỳnh kum ijabê:kumrêx, ane.

<sup>10</sup> Mrãmri kum gwaj bajabêkumrêx. Djãm gwaj ba bamã Metĩndjwỳnh jabê? Kati. Ta ne kum gwaj bajabê. Kum gwaj bajabên kam arỳm Kra jano nhym nã kurũm katon ar ba. Gwaj bajaxwe: nhym Metĩndjwỳnh gwaj bajaxwekam ngryk. Nhym Kra arỳm gwaj bajaxweo pãnh ne Metĩndjwỳnhmã gwaj bakam ngryko apêx, gwaj bakam Metĩndjwỳnh ngryko apêx.

<sup>11</sup> Metĩndjwỳnh kute ã kum gwaj bajabêo anhỳrkam gwaj ren kudjwa bamã aben jabê. Akmere, àpnhĩre ar, imã ar ajabêkam ne ba ar amã ikabên. Dja gar amim ikabênja ma.

<sup>12</sup> Djãm me'õ ne arỳm kàjkwakam Metĩndjwỳnh pumũ? Kati. Me'õ ne kute omũnh kêtikumrêx. Kwãrĩk wãnh gwaj omũnh kêt. Godja gwaj bamã aben jabê nhym Metĩndjwỳnh arỳm gwaj bakad-jwỳnhbê mã amijo kajkep. Gwaj kam bamã Metĩndjwỳnh jabê tỳxo amũ amikamênho mõn bamã abê tỳ:x ne.

<sup>13</sup> Metĩndjwỳnh ne arỳm gwaj bamã Karõ jano

nhym arÿm ar gwaj bajo ba. Gwaj kam baje Metĩndjwÿnh kute ar gwaj bajo ban gwaj bakad-jwÿnhbê amijo kajkepja markumrêx ne amim,

—Nà. Kute ar ijo ban ikadjwÿnhbê amijo kajkep-kumrêx, ane.

<sup>14</sup> Ar ba ne bar arÿm Kra pumũho iba. Mrãmri ne me Babãm djwÿnh arÿm Kra jano nhym bôx. Kute pykakam me axwe kunĩ pytarmã ne me'ÿr bôx.

<sup>15</sup> Me kute memã kum,

—Mrãmri Jejubê Metĩndjwÿnh Krakumrêx, anhÿro baja. Me ja ne me kute amim maro ba. Nhym Metĩndjwÿnh mrãmri me kadjwÿnhbê mã amijo kajkep ne amikôt ar meo ba.

<sup>16</sup> Metĩndjwÿnh kum gwaj bajabê gwaj arÿm tu amim markumrêx ne amim,

—Mrãmri, kum ijabêkumrêx, ane.

Me kum aben jabê japôx djàbê ne Metĩndjwÿnh. Ta ne kum me abê nhym kam me kôt arÿm kum aben jabê. Metĩndjwÿnhkam me kum aben jabê japôx djàkam ne me mã kum aben jabê. Ne kam me mã kum aben jabêja Metĩndjwÿnh amikôt ar meo ban me kadjwÿnhbê mã amijo kajkep.

<sup>17</sup> Dja Metĩndjwÿnh ã gwaj bajo ane gwaj kam kôt bamã abê tÿxo amũ amikamẽho mō. Gwaj kam arÿm bamã abê tÿ:x ne. Nhym kam Metĩndjwÿnh nhõ akati arÿm bôx. Kute memã axwe pãnh jarẽnh djà nhõ akati bôx. Gwaj kam bajbit bamã uma kêt ne dja. Mÿkam? Bir, pykakam gwaj ar babari gwaj bamã abêkam. Gwaj bamã abê kute ta kum gwaj bajabê pyræk. Kam dja gwaj bamã uma kêt ne dja.

<sup>18</sup> Ga, me prĩne kum me abêkumrêxkam arÿm kum me uma kêtumrêxja pumũ. Mÿkam? Bir, me

kute meo bikênh karõ ne me kum me uma. Me kum me umakam ne me prïne kum me abê mex kêt rã'ã.

<sup>19</sup> Mýkam ne gwaj bamã Metĩndjwýnh jabê? Bir, ta kumrêx ne kum gwaj bajabê gwaj kam arým bamã abê.

<sup>20</sup> Nhyam kam gwaj baje Jeju kabênkôt me'õo bakamyja, gwaj bajõ jãm bamã kurên jãm memã kum, “Imã Metĩndjwýnh jabêkumrêx”, ane. Kati. Nã gwãm bajêx. Gwaj baje bakamy pumũnhkam ne gwaj bamã kurêkam te bamã Metĩndjwýnh pumũnh kêtja jabêmã.

<sup>21</sup> Metĩndjwýnh arým gwaj bamã 'ã karõn gwaj bamã,

—Djãm ar amã ijabê? Dja gar amã akamydjwý jabê, ane. Kam dja gwaj bamã bakamy jabêkumrêx.

## 5

*Me kute tu amim Metĩndjwýnh Kra markumrêx'ã ujarênh.*

<sup>1</sup> Mýj xêbê ne Metĩndjwýnh krakumrêx? Bir, me kwý ã pýnhkôt kute mã amim,

—Mrãmri ne Jejubê Kritu. Mrãmri ne Metĩndjwýnh Jeju'ã me banhõ Bênjadjwýrbê kumkati mênhkumrêx, anhýrja. Me kute mã amim anhýr ne tu kute amim markumrêx ja ne mebê Metĩndjwýnh krakumrêx ne umar djã ny. Ne kam mebê Metĩndjwýnh krakam me kum Metĩndjwýnh jabê. Djãm Metĩndjwýnhbit me kum abê? Kati. Amibu'ã mebê Metĩndjwýnh kradjwý ne me arým kum me abê.

<sup>2</sup> Djãm mrãmri ne gwaj bamã amibu'ã Metĩndjwỳnh kra ar abêkumrêx? Mỳj kôt dja gwaj arỳm ja markumrêx? Bir, dja gwaj bamã Metĩndjwỳnh jabên kabên man kôt ar amijo baba. Ne kam kôt arỳm bamã kra ar abêja markumrêx ne arỳm amim,

—Nà. Imã Metĩndjwỳnh kra ar abêkumrêx, ane.

<sup>3</sup> Dja gwaj kute me kute katàt amijo ba'ã memã karôkôt kabênja man kôt ar amijo baban kam arỳm bamã Metĩndjwỳnh jabêkumrêx. Djãm gwaj baje kabên mar ne te kôt amijo babamã? Kati. Gwaj kôt amijo babaja babê tỳx kêt.

<sup>4</sup> Mỳkam? Bir, me kum Metĩndjwỳnh kĩnh kêtja te gwaj bamã amikukràdjà jarê gwaj bamã me kukràdjà kĩnh kêt. Metĩndjwỳnh ne arỳm gwaj bajo kra gwaj arỳm badjumar djà ny. Kam gwaj bamã me kukràdjà kĩnh kêt ne kôt amijo baba kêt. Ne tu amim Metĩndjwỳnh markumrêx ne arỳm me kukràdjà kôt amijo baba kêt.

<sup>5</sup> Mỳj xêja ne me kute me kukràdjà mar kêt ne kôt amijo ba kêt? Bir, me kute tu amim Jeju markumrêxbit. Me kute mã amim,

—Mrãmri Jejubê Metĩndjwỳnh Krakumrêx, anhỹro ba. Me jabit ne me kute me kukràdjà mar kêt ne kôt amijo ba kêt.

*Metĩndjwỳnh kute memã Krao amirĩt.*

*Dju r 5.31*

<sup>6</sup> Ne kam mỳj ne Metĩndjwỳnh arỳm gwaj bamã Kra jarêho amirĩt on? Bir, Kra Jeju Kritu bôx ne nã kurũm kato. Ne kam arỳm abatành ne. Nhym Metĩndjwỳnh kute arêho amirĩt kadjy Djuão arỳm ngômã adjà. Ngômã adjà nhym kam tũmràm

arým kamrô prôt ne arým ty. Djãm ngômã adjàrkambit Metĩndjwýnh gwaj bamã Kra jarênhô amirĩt? Kati. Kamrô prôt ne tykkamdjwý kute o amirĩt. Nhym kam Metĩndjwýnh Karôdjwý ajte Kra'ã amijarênhô amirĩt. Karô mrãmri katàt kute kabêh jarênhkumrêx.

<sup>7</sup> Be, Metĩndjwýnh arým Kra jarênhô amirĩto amãnhkrut ne ikjêkêt.

<sup>8</sup> Karôkôt o amirĩt. Ngômã adjàrkam o amirĩt. Kamrô prôt nhym tykkam o amirĩt. Kunĩkôt ne Metĩndjwýnh kabêh pydji.

<sup>9</sup> Pykakam me kute mrãmri gwaj bamã mýjja'ã amijarênhô amirĩtkam gwaj abenmã kum, “Mrãmri ne amijarênhkumrêx”, ane. Nhym be, Metĩndjwýnh kute Kra'ã amijarênhô amirĩtjakam kabêh katàto kute me kunĩ jakrenh. Kam me kunĩ ren abenmã kum,

—Mrãmri Jejubê Metĩndjwýnh Krakumrêx, ane.

<sup>10</sup> Me kute tu amim Metĩndjwýnh Kra markumrêx ne me amim,

—Mrãmri ne Jejubê Metĩndjwýnh Krakumrêx, anen amikadjwýnhbê markumrêx. Nhym be, me kute amim Metĩndjwýnh mar kêt ne me Jejuo me'õ 'êxnhĩ pyràk. Mýkam? Bir, mrãmri Metĩndjwýnh kute Kra'ã amijarênhô amirĩtkumrêx nhym me kute amim mar kêt kam ne me o me'õ 'êxnhĩ pyràk.

<sup>11</sup> Nhym Metĩndjwýnh arým amijarênhô amirĩt ne memã kum,

—Me kute tu amim ikra markumrêx arým ikôt tĩn ne ar ba rã'ã: rã'ã ne, ane.

<sup>12</sup> Me kute Krao aminhõja ne kôt tĩn ne ar ba rã'ã: rã'ã nhym me kute Metĩndjwýnh Krao aminhõ kêtja kôt tĩn kêt kumrêx ne.

13 Ar aje tu amim Metĩndjwỳnh Kra markumrêx ar. Ar amã ne ba ikabẽn ja'ã pi'ôk no'ôk ne. Mỳj kadjy? Bir, ar aje pi'ôkkam ikabẽn jarẽnh ne mar kadjy. Dja gar aman tu amikukãm kôt atĩn markumrêx. Metĩndjwỳnhkôt atĩn ne ar aba rã'ã: rã'ãja markumrêx ne amim,

—Nà. Dja ba kôt itĩn ne ar iba rã'ã: rã'ã ne, ane. Dja gar pi'ôkkam ikabẽn jarẽn aman kam arỳm tu amikukãm ja markumrêx. Metĩndjwỳnhkôt atĩn ne ar aba rã'ã: rã'ãja markumrêx.

14 Dja gwaj ja man arỳm Metĩndjwỳnhmã mỳjjao a'uw. Ta kute amim gwaj bajã karõ kôt o a'uw ne kum,

—Aje ijã amim karõ kôt dja ga ã imã mỳjjao ane, ane. Dja gwaj ã kum ane nhym arỳm gwaj bama. Ja ne gwaj baje markumrêx.

15 Kute gwaj bamarkumrêx dja gwaj kuman arỳm amim,

—Mrãmri dja kôt ã imã mỳjjao ane, ane. Dja gwaj amim anen arỳm kute gwaj bamã mỳjjao anhỳr kadjy baje amimarkumrêx ne amiwỳr baje mỳjjao badjà'wỳrja markumrêx.

### *Me axwe'ã ujarẽnh.*

16-17 Apỳnh me axwe djari kunĩkôt ne me axwe. Ne kam kwỳ pãnh tyk kêt. Nhym be, atemã me axwe'õ pãnh dja arỳm ty. Godja me'õ me kute Jeju kôt abeno kamy 'õ pumũ, axwe kôt omũ. Gêdja o Metĩndjwỳnhmã a'uw ne kum,

—Djũnwã, amã ikamy kaprĩ. Kwãrĩk wãnh kum axweo pãnh kêt, ane. Dja ã kamyo Metĩndjwỳnhmã à'wỳro ane. Nhym arỳm kum axweo pãnh kêt nhym tyk kêt ne tĩn ne. Nàr me axwe 'ôkôt. Kôt

me tykkumrêxja. Djãm o kute Metĩndjwỳnhmã à'wỳrmã? Kati. Dja mrãmri kôt ty.

<sup>18</sup> Metĩndjwỳnh kute memã amak bôn̄h nhym me umar djà nyja kunĩ kum axwe prãm kêt. Jadjwỳ ne gwaj markumrêx ne amim,

—Nà. Me umar djà ny kunĩ kum axwe prãm kêt, ane. Nãm me amijaxwe kêt kadjy amijãno djan kum axwe prãm kêt. Nhym kam Xatanaj te kute amiwỳr meo akêx nhym me ro'ã axwemã.

<sup>19</sup> Metĩndjwỳnh ne arỳm gwaj bajo kra. Nhym be, Xatanaj arỳm amikôt me kum Metĩndjwỳnh kĩnh kêtja kunĩ ar o ba. Ja ne gwaj baje markumrêx ne amim,

—Nà. Metĩndjwỳnh ne arỳm ijo kra. Nhym be, Xatanaj arỳm amikôt me kum Metĩndjwỳnh kĩnh kêtja kunĩ ar o ba, ane.

<sup>20</sup> Metĩndjwỳnh Kra ne arỳm bôx. Katàt kabên ne katàt kute amijo bakumrêx. Ne kam gwaj baje Kra katàtkumrêxkôt mar kadjy arỳm gwaj bamã bajamak bô. Ja ne gwaj baje markumrêx ne amim,

—Nà. Arỳm ne Kra bôx ne imã ijamak bô. Ije ta katàtkumrêx mar kadjy arỳm imã ijamak bô, ane. Nhym kam Kra Jeju Kritu arỳm amim gwaj bapytà. Katàtkumrêxja arỳm amim gwaj bapytà. Mrãmri kubê Metĩndjwỳnhkumrêx. Gwaj kôt batĩn ne ar baba rã'ã: rã'ã ne. Jadjwỳ ne gwaj baje arỳm tu amim markumrêx.

<sup>21</sup> Akmere, àpnhĩre ar, mỳjjao metĩndjwỳnh karõ nhipêx me kute kum amijarênhja ne kumex. Dja gar amijãno dja. Mỳjjao metĩndjwỳnh karõ nhipêx'yr aje amijo akêx kêt kadjy amijãno dja. Tãm ne ja.



**Metĩndjwỳnh Kute Memã Kabẽn Ny Jarẽnh**  
**New Testament in Kayapó (BR:txu:Kayapó)**

copyright © 2012 Wycliffe Bible Translators, Inc.

Language: Kayapó

Translation by: Wycliffe Bible Translators, Inc.

Kayapó [txu], Brazil

**Copyright Information**

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Kayapó

**© 2012, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

---

PDF generated using Haiola and XeLaTeX on 18 Apr 2025 from source files  
dated 29 Jan 2022

385317df-3c6a-53ac-81db-0815750ed560